



✉ CEDE DI MEP SANTA CRUZ 74 D
☎ 297 585 6917
f MEPOfficial

Aruba, 9 september 2024

Sr. Arends, sr. Matos,

A raiz di bo mail di 8 di september 2024, den cual bo ta puntra den nomber di RAIZ pa MEP duna bos otro nomber pa Presidente di Parlamento, mi ta informa bo como lo siguiente.

E acuerdo entre MEP y RAIZ, cual ta e acuerdo fundamental riba cual e coalicion di MEP y RAIZ ta basa, ta encera cu MEP ta apunta un presidente di Parlamento, y RAIZ ta apunta vicepresidente di Parlamento. Tambe cu MEP ta apunta su ministernan y RAIZ ta apunta su ministernan. Tambe despues nos a palabra cu MEP ta apunta GevMin na Den Haag y RAIZ ta apunta GevMin na Washington. Riba e ultimo aki, MEP a indica cu tin duda si e candidato cu RAIZ a propone ta e miho candidato pa e funcion, pero RAIZ a persisti. Despues a candidato mes a retira su candidatura. Pues desde 3 año pasa, e palabracion ta cu MEP ta apunta e presidente, y no cu RAIZ ta determina ken di MEP por bira presidente. Mescos cu MEP no por a dicidi pa RAIZ ken ta bira minister of vice presidente pa RAIZ. E palabracion aki a wordo ehecuta sin ningun problema pa tres año largo.

Pues e peticion di RAIZ, apenas diahuebs ultimo pa prome biaha verbalmente, y apenas un dia pasa por escrito, a sorprende MEP. Mas aun mirando cu te na e momento aki RAIZ no por a substancia kico ta e motibo di desconfiansa. Es mas, den reunion cu lider di partido RAIZ dia 8 di september 2024, e mes a indica di no ta na altura di esaki. Manera nos representante a menciona na sr. Matos den e proceso di escalacion na diferente ocasion, partido MEP ta mantene su mes na e palabracion fundamental desde inicio di e periodo parlamentario despues di eleccion 2021. Locual ta encera cu partido MEP conforme palabracion ta postula e candidato pa Presidente di Parlamento y partido RAIZ ta postula su candidato pa Vicepresidente di Parlamento, y MEP lo sigui respeta e acuerdo aki. Esaki tabata e caso den e ultimo 3 añanan y lo ta igual pa e año aki pa e periodo di Parlamento nos dilanti, al menos cu RAIZ kier renegocia e acuerdo, pero esaki no a wordo pidi pa RAIZ.

Despues di consulta cu Consejo di Partido di MEP, consistiendo di directiva, candidatonan, y presidentenan di distrito, e posicion no a cambia pa locual ta e palabracion ariba menciona, y Partido MEP ta para tras di e candidatura di e Presidente actual, Edgard Vrolijk. Sr. Vrolijk ta e parlamentario cu a traha mas ley den nos Parlamento, entre otro tur e leyman di integridad, y ta esun cu ta e motor tras di introduccion di Ombudsman, e uta den su fase final. Aparte di esey, a sa di profesionalisa e aparato di Griffie der Staten, buscando e personal cualifica necesario, invirtiendo den e infraestructura, y ta encarga cu e proyecto grandi di remodelacion di e edificio di Parlamento.

Pa loke ta trata e nombrenan di candidatonan pa votacion, esaki ta forma parti di e proceso politico y manera ta e caso tur inicio di año parlamentario lo ser informa pa medio di e lider di fraccion di MEP na e lider di fraccion di RAIZ y viceversa manera a bin ta sosode e ultimo añanan.

Gobernacion ta algo serio, y su continuacion tambe, manera mi a informa lider di RAIZ ayera. Pesey mi ta lamenta cu RAIZ a duna declaracionnan den prensa, den cual publicamente a anuncia e intencion di kibra e acuerdo entre MEP y RAIZ. Mi speransa ta cu di parti di partido RAIZ lo tin e reflexion necesario na bienestar di pais Aruba, y pa cumpli cu e acuerdo entre MEP y RAIZ.

Atentamente

Evelyn Wever-Croes, Lider di Partido MEP